






# BOJEMIS

*Omnibus amantibus Patriam S. D.*

 Mo Patriam, mi Bojeme, anice πολλὰ ἄξιε,  
quæ communis est omnium nostrum pa-  
rens : amo patriæ solum ; quod cum omni-  
bus est charum, tum veró dulce atque jucundum .


Tu si idem facis, & cum grata recordatione in  
mente tua revolvīs; quod hīc locus est; hīc dii pe-  
nates patrii; aræ; foci; lar familiaris, ubi quisque al-  
tus & doctus; quod hīc; & non in Roxolania orti stir-  
pe antiquissima sumus; quod hīc genus, hīc majorū  
nostrorum, & non Roxolanorum vestigia habemus,  
tum pro eo amore, quo decet chariorem esse patriam  
nobis, quàm nosmetipsos, cui nos totos dedere, & in  
qua nostra omnia ponere, & quasi consecrare debe-  
mus, lubentius hunc sermonē meū á quibusdam feré  
extortum, (quem maluissem inter chartas meas de-  
litescere & pabulum esse tinearum) de Bojemia Pia  
contra Roxolanos leges. Vale Optime Patricie bo-  
no patriæ, cui natus es, & mea officia tibi semper di-  
cata & parata habeo.

BIBLIOTHECA  
UNIV. JAGELL.  
CRACOVENSIS

910865  
I

*Aut*





SERMO PRIOR.  
DE  
ORIGINE BOHEMORUM  
præmissus 17. Febr.  
PROMOTIONI BACCALAUREORUM

**S**I quantum animi, tantum asserrem ingenii,  
(Auditores N.) ad exequendas muneris &  
officii præsentis partes, sperarem profecto vo-  
bis omnibus hanc meam orationem gratam & jucundam  
fore. Sed fateor meum ingenium minimè voluntati  
meæ, & vestræ expectationi respondere posse, præsertim  
dum cogito, quod argumentum vestris eruditissimis  
auribus gratum ac jucundum foret. Omnes enim  
materiae, quæ in hujusmodi Philosophica aliqua solen-  
nitate proferri possunt, ita sunt excussæ, ut ne vix quid-  
quam produci possit, quod non jam ante satis copiose sit  
pertractatum, ut quocunque me vertam, actum agere  
videar. Audivistis, non ita pridem (ut alia omittam)  
vitam Caroli IV. Imperatoris tractatam; audi-  
vistis



stis filiorum ejus, Vencesilai, quem aliae Nationes Ignavum appellant, & Sigismundi, Regum & Imperatorum, vitas, res gestas e tenebris in lucem revocari: audi-vistis Georgii Podiebraczii, amorem erga Religionem & patriam celebrari: audi-vistis, Principes, Duces, Comites, Barones, Nobiles, titulos Academicos non respuere, sed iis insigniri voluisse; audi-vistis milites Apollinis & Musarum, milites Imperatorum, Regum, Ducum, etiam fortissimos gloria nominis superare posse.

Nunc ut animos vestros aliqua voluptate devincere & inflammare in hac promotione horum 17. Juvenum Ornatissimorum queam, selegi argumentum id quod omnes scire, refert, de Origine Gentis Nostrae Bohemicae: An ejus Iudices, Duces, Reges & Imperatores ex Roxolania Genealogiam suam accipiant, praesertim propter eos, qui ex Roxolanis & Scythis genus suum ducere malunt, quam a primis illis Colonis terram hanc inhabitantibus; postea propter eos, qui magis Nationum aliarum discunt origines, genealogias, & domesticas negligunt, cum eorum inter sit domestica prius, quam aliena scire & intelligere.

Deinceps,

Nescio, qua natale solum dulcedine cunctos

Ducit, & immemores non finit esse sui.

Quod



*Quod Homerus Poëtarum Coryphæus, prudentissimi Ulyssis luculentissimo comprobavit exemplo, quem adeo patriæ amantem introduxit, ut si modo fumū sibi, de genitali terra exeuntem videre liceret, haud reluctaretur mori.*

*Quod dum facio, abs te qui Patriæ hujus nostræ Protector, Conservator, & Defensor semper fuisti, ut modo de ejus Origine dicenti mihi, pro tua Clementia adesse, actumq; hunc omnem ita dirigere & promovere velis, ut in hoc confessu, & omni vitæ meæ vocatione, nihil dicam, nihil faciam, nisi quod tibi gratum, hujc Academiæ adeoq; Patriæ nostræ commodum & salutare.*

*Te verò Magnifice & Generose Dn. Dn. Rector, Vos viri veneranda pietate, nobilitate, dignitate, doctrinā atque prudentiā longè præstantissimi, Vosq; Liberalium artium Studiosi & alumni Ornatissimi, Vos singulos & universos eā qua par est reverentiā, & humanitate rogo, ut mihi, non oratoriē, sed nudē ὡς ἐν παρόδῳ verba facienti, benignas & benevolas aures accommodetis. Quod vos, eo facilius facere spero eoque libentius, si memineritis, & ut meminisse velitis, precor, illius, ubi ait.*

*Et pius est, patriæ facta referre, labor.*

*Nulla quæstio magis exercuit historiarum Scriptores,*



res, quàm quæ habetur de Origine populorum; nec plures interitus Rerumpublicarum, aut bella Civilia sæpius gesta memorantur, quàm pro generis claritate ac splendore, cum alii opibus, aut scelere, aut majorum Virtutibus parta nobilitate seipsos ab aliis sponte divellerent, & eorum affinitatem repudiarent. Extremum fuit arrogantiae genus eorum, qui humana conditionis obliti, se à Diis ortos esse prædicarent, quod non modo imprudentibus ac stultis contigit, sed etiam iis, qui in summa sapientiæ ac Virtutis opinione floruerunt. Neque enim erubuit C. Cæsar in concione populi Romani, jactare se maternogenere à regibus; paterno verò à Diis ortum traxisse. Quin ipse Aristoteles ad Æsculapium & Apollinem retulit suum genus. Hinc opinio divinitatis eorum, qui cum homines esse desiissent, se DEOS fore arbitrarentur.

Atque hæc superbia potentiorum ad infimos usque manavit, & non tantum manavit, sed postea cum in libros historicos irrepsisset, multos errores peperit. Et ne multas aliarum Regionum origines recenseam, ipsa hæc Bohemia testis erit. Nam alii statim à secundo generis humani parente Noao Bohemos originem traxisse affirmant. Et rectè sanè, si generaliter semina cunctarum gentium per filium Iaphetum propagata  
respi-



respicimus. Quotquot enim Europam incolimus, filii  
Iapheti sumus. Fuit autem Riphath Gomeri filius,  
Iapheti nepos pater Henetorum, qui Venedi, Vindi, &  
Slavi dicti sunt. Hic cum posteritate longa non modo  
vicinas arctoe plagae mundi partes tenuit, sed & focos,  
arásq; in Paphlagonia habuit. Alii rursus, qualis  
est Procopius & Albertus Grantzius tradunt, Slavos  
ex Scandia Justiniani temporibus in Pannoniam irru-  
pisse, ac nominis sui nomine, lingua, & fama, Euro-  
pam universam implevisse, eo quod Croatia, Dalma-  
tia, Bulgari, Poloni, Lithvani, Slavi ea lingua utantur,  
quae in Scandia usurpatur, licet dialecto diversa. Ioan.  
Merygnola Episcopus Florentiae, & post eum alii affir-  
mant, Slavos ab Elisa filio Javani, avo Iapheti originē  
ducere. Sed hoc non modo cum scriptis historicorum  
non consentit, sed etiam maxime pugnat cum Hierony-  
mo, qui asserit Aëolas Asiae minoris inhabitatores ab  
Elisa esse prognatos. Liquet autem ex melioris notae  
Historicis, Bojos, à quibus Bojemia dicta, haec loca, &  
has regiones tenuisse. Sic enim Tacitus: Boemia  
quidem à Bojis Galliae populis gentilitium Galliae nomē  
adhuc retinet. Et Melanctht. in Chronicis; Nomen  
& Regionem Boemiae adhuc novit haec aetas; Quia  
Bojigenae Alpina, in ea loca transiverunt ad silvam  
Gäbre-



Gabretam, quæ nunc Bohemia appellatur.

Fallunt itaque & falluntur, qui ante Czechi adventum, nullos incolas hîc fuisse affirmant; Quin potius constat, anno á condito Mundo 2500, temporibus Josue á Bojogero filio Alemmani Regis Sarmatiæ urbes amplissimas fuisse erectas; Vnam dictam Bojohemum, ubi nunc ipsa Praga est; Alteram, Bojodurum, ubi hodie Passovia, quæ milites ante annos quatuor, non tantum in perniciem Bohemiæ aluit, sed eosdem ad eversionem heri & nudius tertius, hujus Urbis misit, multisque Colonis Bohemiam viduavit.

Post hos Bojos, loca hæc tenuisse constat, Suevos, Marcommannos, Hermunduros, donec bellis superati & victi, partim á Romanis, partim etiam ab aliis, Czechus & Lechus cum multitudine Henetorum in Bohemiam venissent, eamq; colonis implevissent, quos DEVS, terraq; in hunc usque sovent diem. Atque illi, qui antea Vindi, Venedi, Slavi & Slavini appellabantur, jam hodie Czechi seu Bohemi á suo primo Duce vocantur & appellantur.

Et si Historicis credendum, uti credendum maximè, bellorum illa tempestate, vel nullæ omnino, vel admodum raræ in hac regione fuere Civitates.

Czechus enim si Sylviò credimus, indigenas lacte & venatu,



venatu, Nomadum more, vitam sustinentes, agriculturam & edificandi artem primus docuit. Sub quo præter Curimam à Lecho in Poloniam abituro conditam, & duos pagos Kleneczium & Charvateczium in memoriam Gentis & filii sui Kleni, nihil conditum est, qui postea cum vixisset in hisce oris, ad radices Montis Zržit, non procul Raudnicio vitam cum Morte commutavit, & non sine miserabili vulgi comploratione, in amena planicie, quæ non adeo remotè ab ipsius domicilio Czechi erat, sepultus est. Vnde retinendæ memoriæ sui Ducis causa pagum Cztinioves Comites edificaverunt.

Parva quidem initia & principia exilia; Sed vera gloria & magna laudis ratio. Ex qua illud proficitur adhuc hodie commodi, ut erudiatur posteritas, nō casu, non temerè, sed singulari DEI providentiâ factū esse, ut gens illa, in vitis etiam Germanis loca hæc teneret; Urbes plurimas, easq; nobilissimas & florentissimas conderet; Respublicas legibus munitas fundaret, & regiones per omnes districtus hujus regni coleret.

Quod verò Aventinus de Czecho & Lecho affert, nec recitare, nec refutare volo. Nam si bos capite ultra Tagyetam porrecto, bibit ex Eurota; Quid mirum? si veluti ab uno fontis capite, divergio quodam

B

in flo



*in florentissima duo regna hæc gens est deducta. Neque conjectura illorum Roxolanorum moveor, qui abutentes autoritate historici, eam in Bohemorum originem detorquent, dum scribunt; Bojemorum nationem non ex Sclavis ut Æneæ Sylviò, & Joanni Daubravio videtur; Sed ex Roxolania esse; Quasi majore contumelia is ipse, Antecessor quam in quos ista scripta sunt, seipsum non afficiat. Ah quanto æquius fuisset, vel eum ipsum, cujus parentes, fratres, & affines eo in loco natos & educatos esse constat, amore mutuo Patriam prosequi. Cujus libet enim officium est, de patriæ emolumentis subinde & sollicitè cogitare, atq; in conservanda, illustrandaque ea, omnes animi corporis & fortunæ Vires, nervosq; intendere.*

*Dii immortales, exclamat Cicero, dici vix potest, quid charitatis, quid voluptatis Patria quævis habeat. Nescis, nescis, quod alia Menecles, alia Porcellus loquatur. Quin etiam leges sanciunt, dicunt & loquuntur; Patria cuilibet debet esse dulcissima, addit glossa, sive sit parva, sive sit magna. Et Agis Archidami Filius nihil illis fidendum esse dixit, qui in natale solum & Patriam impii essent. Vbi ergo judicii acumen? ubi mens? ubi ardor animi? Quid cupiebas? quid optabas his efficere. Finge sanè tuos illos socios quod*



quod ab Hercule, vel Tuiscone filio Herculis originem trahant: Finge eos, aut ex Romanorum sanguine, aut sané ex ipsa genealogia Alexandri prognatos esse, efficies consimiliter, ut indocti pictores, qui cum virginem Mariam in stabulo malé tecto parientem constituent, eandem aurea veste & corona, nobili solacissimo exornant. Vera enim est Platonis sententia, quam Sylvius contra ejusmodi imperitos, qui nisi quod ipsi faciunt, nihil rectum putant, usurpat; Omnes reges ex servis ortos omnes servos ex regibus. Et mirum est profecto, quid istis hominibus qui primo anno omnia sciunt secundo dubitant, tertio nihil sciunt, in mentem venerit, cum á Q. Mutio Scævola Pontifice olim Romanorū maximo, & omnium, quorum scripta in Pādectas translata super sunt, I. C. orum vetustissimo, reprehensum legamus Publium Servilium Sulpitium, nobilem illum civem Romanum, quod jus urbis ejus, in qua versabatur, ignoraret? quanto reprehendendi magis, qui genii, statius velloci illius in quo commorantur, & cujus se cives profitentur, parvam, aut nullam sibi compararunt noticiam, præsertim illi, qui literis sunt dediti, & bonarum artium, atque antiquitatis Studiosi audiri cupiunt. Tales profecto pro aris & focis, pro salute & incolumitate patriæ, gravissimis



periculis ultró se non exponunt; neque pro Patria mori dulce & decorum existimabunt, cum ex Jureconsultorum Scitis, tales ex mortalitate immortalitatem consecutos, etiam nunc per gloriam & in perpetuum vivere intelligant.

Atque sic animadvertitis, quæ nam ex his, sententia sit tutior & verior. Recté n. Livius; in antiquis, quæ similia veri sunt, pro veris accipienda. Multum, uti ille dixit, continet gratiæ antiquitas, si haberi possit. Antiquissima autem antiquissimorum historicorum est, de Origine Bohemorum hæc sententia, quam Roxolani isti nunquam evertent, neque scripto illo contumelioso alicuj perusidebunt. Maneat Roxolanus, qui Czechus aut Bohemus esse non vult. Maneat Scythæ & barbarus, qui suos veteres pro barbaris agnoscit. Nam etsi utitur voce Barbari Sylvius, quod videlicet Bohemia in solo barbarico trans Danubium sita sit, tamen pauló post, dicit Gentem promissi tenacem, quæ planè naturæ barbarorum repugnat: Dicit Religiosam; Si universum populum simul expendas, non est qui religioni adversetur. Et cap. 36. Nullum ego regnum ætate nostra in tota Europa, tam frequentibus, tam augustis, tam ornatis templis dicatum fuisse, quàm Bohemicum reor.

Deinceps loquitur ex communi opinione, sicuti Ro-



xolani, cum jam constet ex superioribus, Bohemos ab  
Henetis originem traxisse. Quod si more Italicum,  
Et odio causa religionis nato, hoc nomine Bohemos tra-  
ducit, sinam eum, sicuti istos Roxolanos suo abundare  
judicio. Bohemia Et gemmas suas, Et dona sua, Et  
vitia sua, ut Italia habet. Et quis hominum scit,  
quantum regio regionem, in his vincat rebus. Sepe  
Clodius accusat machos: Aegisthus adulteros; Cati-  
lina Cethegos. Et vulgare est;

Anglia peccatrix, Germania fraudis amatrix,  
Gallia dat vites, nutrit Britannia lites.

Præterea, neque id novum, nam Et antiquis hoc  
vulgare fuit. Unde Græci tres populos improbitatis  
notarunt.

Lydi improbi, post hos secundi Ægyptii,  
Tertiiq; Cares perditissimi omnium.

Et notum est, quod ferè pro ænigmate usurpatur,  
τρία καὶ πᾶ καλῖστα, nempe trium nationum, Cappado-  
cum, Cretensium, Et Cilicum. Quæ postea detorsērunt  
in Cornelium Syllam, Cornelium Cinnam, Et Corne-  
lium Lentulum, quibus tamen fides non est adhibenda,  
eó quod plura conficta sunt contra nationes peculiari  
odio scribentium, vel temeritate iuacii.

Sed redeo eó unde sum digressus. Gens itaque Bo-  
hema,



hema, cum jam hæc loca teneret, non contenta ea amplitudine regionis ( sicuti est insatiabile hominis ingenium & habendi cupido ) sed magnitudine animi elata, belli perita, periculorum contemptrix, ( ut loquitur Sylvius ) negotium subinde & indesinenter finitimis in colis faceſſebat, donec mutato ſtatu, & gubernationis forma commutata, ſub clientela ducum eſſe cepiſſet.

Postquam enim Judices Bohemæ, ( Zechus, Crocus & Libuſſa judicaſſent Bohemos in diſtrictu Zrſitenſi, hodie Lidomierzicz enſi, annis 87 tandem politia illa verſa eſt in ducatum, cujus dux & Gubernator primus fuit Premyslaus, non ruſticus, ut quidam volunt. ſed vir nobilis, agriculturæ tamen veluti Cato Cenſorius, Lucullus, Sulla, & Diocletianus ſtudioſiſſimus. Is itaque a ſtiva ad ſceptrum, ab aratro ad ducatum Bohemæ, de agro in thorum conjugalem Lybuſſe venit, leges nervos Rerum publicarum promulgavit, quæ in uſu uſque ad Caroli IV. Imperatoris anguſtiſſimi tempora fuerunt, quas ille poſtea, quia ſe veriores forte erant, antiquavit, & novas in locum earum ſubſtituit.

Errat itaque vehementer Aubanus ille Teuto-Bohemus cum Sabellico, oſor gentis noſtræ turpiſſimus, qui præter id quod Bohemos variè reprehendit, etiam iſcæ nullas eſſe leges fingit, cum vel locus hic; conſtitutiones  
Regni,



Regni, & jus municipale id refutent, ejusq; mendacia  
evincent. Dignus cum isto suo scripto pistrino, ut  
id tam diu permolat, donec verius appareat: Et pater  
ejus, si in vita nunquam peccavit, tamen majorem in-  
juriam nationi Bohemicae facere non potuit, quàm quod  
talem filium genuerit.

Post Przemyslaum ex ejus tamen stirpe duces alii  
sex erant, qui cum Premyslao annis 168. Ducatum Bo-  
hemicae, qua poterant cura, & diligentia, & Premy-  
slaus quidem contra Ulastam & ejus puellas; contra  
emulum suum Toparcham Curimensem, ut Nezamy-  
slaus, contra Misnenses & Moravos, ut Vogenus;  
contra Urssoviczios, ut Cresomyslius, qui & Necla-  
nus, rexerunt & gubernarunt. Nec alia de stirpe  
erant Duces Christiani, Borzivogius primus Christi-  
anus, Spitihneus I, Uratislaus, Venceslaus Sanctus,  
Boleslaus crudelis, Boleslaus pius, Boleslaus mitis, Fa-  
romir, à fratre excacatus, Vdalricus, Bretislaus Achil-  
les Behemicus, & Spitihneus II. dictus <sup>mus. regnavit</sup>  
qui ignorantes Roxolaniā in ea nasci non potuerunt.  
Reliquum tempus, quod fuit, est, & DEO benedicente  
erit, sub Regibus, qui partim é stemmate Premyslai per  
annos 584. regnarunt, partim é domo Austriaca, &  
Luceburgica imperarunt, & adhuc imperant de qui-  
bus



bus omnibus & singulis longum esset dicere, præsertim in hac asperitate frigoris. Taceo & interregna, ubi Principes non ex Roxolania, sed ex genealogia Ducum Bohemorum, prognati erant. Ostendunt hoc eorum nomina, ostendunt genealogia, stirpes & linea.

De quorum regno dici potest, quod de L. Lucullo Plutarchus scripsit, & Cicero confirmavit, eum cum ad Mithridaticum bellum, à Senatu Romæ profectum, tantum Imperatorem factum, ut non modo opinionem omnium quæ de ejus virtute erat, vicerit, sed etiam gloriam superiorum.

Vtinam Roxolanis istam mentem Diu donarent, ne dum in sole versari volunt, cecutiant; sed potius Solem ipsum videant, historiam quid certi & veri habeat, dijudicent. Aliàs frustra current, & nugæ agent. Sed tu DEVS clementissime, qui tuo justissimo arbitrio Regna dispensas; progeniem justitiæ atque clementiæ observantium benigne, ut David canit, custodis, nobis & posteritati nostræ, ejusmodi Reges concede, qui difficultates, quæ rebus mutuis, & ad interitum accelerantibus incumbunt, sustinere possint, præpotenti tuæ fortitudinis manu, fulcito, sustentato & defendito.

Vos



*Vos etiam, quos*

Vincit amor Patriæ, laudumq; immensa cupido,  
date operam, ut Patria, quæ communis est omnium no-  
strum parens, vestra doctrina, vestra diligenti histo-  
riarum lectione, sit illustrata, & á tanto contemptu  
vindicata; sit inscriptum in fronte unius cuiusque,  
Patria fortiter propugnanda; firmiter animis vestris  
impressum, pro aris et focis pugnandû, ut si postea quan-  
do necessitas postularet, possetis dicere cum Solone, O  
Patria tibi & dictis & factis sumus opitulati: Aut  
cum Lacedæmoniis? Quid tandem tetare potest,  
quo minus in pugna pro patria Mortem oppetamus?

Hoc si feceritis Amorem erga Patriam, gratitu-  
dinem erga Majores vestros, opera &  
studio declarabitis.



SERMO ALTER  
DE  
STATU ECCLESIAE IN  
BOHEMIA.

IN  
PROMOTIONE MAGISTRORUM

26. Martii.

**M**irari meritò quispiam possit, *AVDITO-  
RES* Præstantissimi, cur orientem hujus  
vernalis diei lucem, latissimis instrumento-  
rum sonis, & suavisissimis harmoniæ musicæ concenti-  
bus, hilarisq; vocibus, vultibus, ac animis serenis  
inchoemus.

Et cogitat fortè aliquis *Musis* & literis quod no-  
vum gaudium oblatum? Vbi locorum eisdem regnum  
novum paratum? Vbi gentium novus *Apollo* natus?  
ubi chorus *Musarum* novus creatus? ubi *Helicon*?  
ubi *Parnassus* novus excitatus? Nihil eorum est,  
*Hospites* optatissimi, sed primùm testari volumus, re-  
lictò illo exitu superstitioso in Sacellum nostrum, ut vo-  
cant vulgò, *Corporis Christi*, dum Rector *Academiæ*  
hujus



hujus, non solum cum omnibus Professoribus, sed etiam  
cū omnibus Scholis Pragensibus, ad Commemorationē  
Imperatoris Invictissimi, Caroli IV. Patris Patriæ hu-  
jus amantissimi, et Fundatoris Academia nostra augu-  
stissimi, heri & hodie binis vicibus exire solebat, &  
ibi nonnunquam quæ manifestè verbo DEI repugna-  
bant, audire cogebatur, gratam nobis nostri Mecena-  
tis, nostri Patroni, esse memoriam, gratiorem ejus com-  
memorationem, gratissimum hoc solenne festum, quod  
hodie per promotionem horum sex Ornatissimorum  
Licentiatorum, recolitur. Exclamat enim Regius  
Propheta, de eo quàm honorificentissimè; in memoria  
eterna erit justus, & ab auditione mala non timebit:  
exclamat quàm sanctissimè; Sanctorum Mortem in  
conspectu DEI esse preciosam; exclamat quàm beatissi-  
me, Jusus venit ad pacem, & Viri pii quiescunt in cu-  
bilibus suis. Postea, quemadmodum Romani sua  
Hilaria circa hoc æquinoctium vernale Romæ cele-  
brabant, eo quod Sol longiorem diem nocte efficeret;  
ita nos hodie nostra celebramus Hilaria, dum hi Orna-  
tissimi Licentiatī, longa cura, multa nocte, magnis vi-  
giliis quæsitum Solem jam splendidissimum illucescere  
vident, dum laborum suorum præmia digna, & in di-  
vine Philosophiæ regno maxima, hodie, DEO nobis

*caelestem gratiam accommodante, consequuntur.*

*Te igitur ó Sol Sapientiae divinissime, qui hanc  
Academiám, in eáque tam docentes quàm discentes,  
sub alarum tuarum umbra benignè protexisti, eáque  
tanquam annulum signatorium in manu tua, imò ceu  
pupillam oculi in hisce tempestatibus rerum huma-  
narum custodivisti, oramus, ut nobis, non tantùm hilaria  
nostra hoc die, sed perpetuó, nobis, Ecclesiæ, & Reipub.  
halcyonia, pro tua erga genus humanum misericordia,  
concedas.*

*Deinceps ad te Generosè & Magnifice Dn. Dn.  
Rector, oculos a coram nostra convertimus flagitantes, ut  
tum sceptrorum presentium splendore, tum trabæ ac  
vultus tui claritudine, ad finem usque nostri instituti  
honorificè perfruamur. Vos denique omnes Audi-  
tores Præstantissimos, oramus, ut non modo sere-  
nissima fronte, sed etiam benignissima voluntate ac  
animo, hæc nostra Hilaria audire ne gravemini.*

*Et quia in hoc actu promotionis, mea vox debet  
esse prima, dabo operam, ut non minus jucundæ, quam  
fructuosæ orationis recitatione vos oblectem. Dicam  
autem, loci & temporis habita ratione, quæ ad hunc  
cætum nostrum summoperè illustrandum, tum ad præ-  
sentem actum mirificè exornandum faciunt, de Statu  
Ecle-*



*Ecclesiæ in hac nostra Patria, qualis is fuit sub initium, qualis in progressu, & qualis jam modo est, & ad finem si DEVS volet, erit.*

*Ac ut statim à primis incunabulis videamus, quod quærimus, fatendum quidem est, æquè Bohemis id evenisse, quod aliis. Nam sicuti aliæ gentes, præsertim verò Romani, semper erant superstitiosi, & Deos multos pro diversitate rerum & casuum colebant: Ita etiam primis hujus Bohemiæ incolis evenit, qui abjecta veri DEI cognitione, ad mundana se convertendo, visibilem DEVM, qui tamen in accessu luce habitat, in mundo quasi verunt, sibi que pro libitu finxerunt, & pro ipso Creatore, res fictas, Faunos, Nymphasque colebant; et quod turpius dictu, femine natura superstitiosæ, quod ipsæ fecerunt, manibus palparunt, Dearum imagines divino honore dignas judicabant. Tetka enim Klimbam idolum consilii: Libussa Zelu divinationis; BanKa uxor Uogeni Kybalam scientiæ; quin & Lidmila Krosinam, frugum Deam venerabantur. Atque sic videre est, si quispiam cæperit excutere timorem et honorem DEI, vel divini Numinis reverentiam, omnia sibi licere putabit. Et quia mutaverunt gloriam incorruptibilis Dei, in similitudinẽ imaginis corruptibilis hominis, propter quod tradi-*

dit illos *DEVS* in desideria cordis eorum.  
Prestat ergo *DEVM* sic colere, sicuti se patefecit.

Felix autem terque quaterque *Borziuvogius*, qui ex hac superstitione & idololatria, ad veram religionē, per *Methodium* primum Apostolum Evangelii concionatorem, in *Bohemia* perductus est. Felix ille ter & amplius, qui ex hoste *DEI* miles factus sit fortissimus, & non tantum ille, sed cum uxore sua, & filiis *Spitihnevo* & *Uratislao* á *Methodio* per baptismum *DEO* consecratus est.

Quibus quæso Vos mei Optatissimi Hospites, cogitate, quomodo circa hæc initia *Draco* ille magnus, *Serpens antiquus*, sibilaverit? quales huic viro bono cogitationes moverit? præsertim cum ejus instinctu ab ethnice religionis & Magnatibus, plebēque superstitione, pulsus fuerit in exilium. Profecto videri potuit, hæc ejus felicitas brevīs & evanida. Perstitit tamen ille uti fortissimus miles, & super *Draconem* hunc obtinuit victoriam. Nam revocatus postea publicis Comitibus, non tantum citra sanguinem et tumultum, populum suum ab ethnicismo revocavit, eundem baptizari curavit, sed templa aliquot, præcipue vero hoc *Pragæ* ad *Lætā Curiam*, quasi & Metropolitānum, erexit.

Neque



*Neque his contentus, majora cum suis Christianis  
novis aggressus est, & ad Papam legatos misit, ut non  
lingua Romana, sed nativa Bohemica, sacra celebra-  
re in templis concedat. Quod cum obtinere non po-  
tuisset, etiam Cyrillo Episcopo Methodii fratre, apud  
Papam & Episcopos, qui centum & tredecim concilio  
illi præsidebant, intercedente, Audita est vox in eo  
concilio tanquam decelo missa; Omnis Spiritus lau-  
det Dominum, & omnis lingua confiteatur ei.*

*O quàm dulcissimum hoc melos fuit, quàm jucun-  
dissimum canticum; Vox plena leticiæ: Vox exul-  
tationis & letitiæ; Vox gratiarum actionis & lau-  
dis; Vox omnis felicitatis supereminens gloriâ, supera-  
bundans leticia, & afferens omnia huic Regno fausta.  
Hanc Vocem exultationis quoties considero, toties lu-  
bens ac letus agnosco, eam fuisse voluntatem DEI no-  
stri maximi, ut ab hominibus nostræ gentis, doctrinæ  
veræ semina, & Religionis puræ initia spargerentur,  
& ad alias Nationes propagarentur. Magna ope-  
ra Domini; magnus & excelsus Dominus super o-  
mnes gentes, & super celos gloria ejus. A Domino  
hoc factum est, & est mirabile in oculis nostris, & o-  
nium gentium. Dominus memor fuit nostri, &  
benedixit nobis. Dominus DEVS noster redempti-  
onem*

onem misit populo suo, mandavit in aeternum testamen-  
tum suum. Quis ergo sicuti DEVS noster, qui in  
altis habitat, & humilia respicit in caelo & in terra.

Perculsi itaque hac voce caelesti omnes illi Episcopi,  
& admirati audaciam Bohemorum, quod id petere  
ausi fuerint, quod baptizatorum nemo adhuc petiit,  
concedunt Bohemis, ut sua patria lingua sacra celebra-  
rent, & cantus vernacula lingua in templis institue-  
rent. Vtinam hodie omnes Pastores Ecclesiarum  
nostrarum, huius institutionis sint memores & obser-  
vantes, non haberemus tot Voces latinas, tot Gracas  
in conventibus Ecclesiasticis; non audiremus tot boatus,  
tot strepitus, tubarum & fidium. Nam si nesci ve-  
ro vim vocis, inquit beatus Apostolus, ero ei qui loqui-  
tur barbarus, & qui loquitur, erit apud me barbarus;  
Sed haberemus loquentes nobis ipsis per Psalmos,  
hymnos, & cantiones spirituales. DEVS profectó  
non est autor confusionis, sed pacis in omnibus congrega-  
tionibus sanctorum.

Verum non diu talis ritus DEV M celebrandi  
mansit in Bohemia. Ditmarus enim Episcopus  
Pragensis brevi post eum abrogavit, & impia illa  
Drahomira, ethnicorum rituum acerrima propugna-  
trix; Christianae pietatis infestissima hostis, publica vi  
oppress-



oppressit, & furiali furore innumeras Christianorum  
myriades exhaustit. Infernalis hæc insania, usque  
ad tertium annum duravit, donec absorpta terræ hiatu  
in castro Hradczan periisset, & Venceslaus dictus  
Sanctus, legitimus paterni principatus hæres, halcyo-  
nia Bohemis Christianis denuo concessisset, Religionem-  
que receptam promovisset. Sed ut vulgo solet dici,  
ubicunque DEVS templum erigit ad salvandos ho-  
mines verbo, ibi protinus Diabolus sacellum adjungit,  
ad eosdem seducendos. Nam cum hanc pietatem &  
Religionem Christianam fratris sui Vencesilai, Bole-  
slaus dictus Crudelis ferre non potuisset, eundem ad lu-  
stricum convivium invitatum, inter pias preces ene-  
cat, & occupato principatu Bohemiæ tyrannicè, in Ci-  
ves pios & Christianos sævit; Sacerdotes perimit,  
Pragam oppugnat, templa Christiana demolitur, do-  
nec ab Ottone, cognomento Magno, Romanorum Im-  
peratore, ne Ecclesia Bohemica, ab amente & crudeli  
principe, quasi in cunis extingveretur, ejus furiosa ra-  
bies & sævitia, repressa fuisset. Nihilominus ta-  
men hanc Religionem propagare & defendere studue-  
runt, Adalbertus Slavnicii filius; Theodatus (aliàs  
Bohdal) vir liberalibus Studiis apprime eruditus; &  
ut Cosmas loquitur, artibus probis & moribus decora-

D

tus,

tus, *severus delinquentium reprehensor*; *Eccardus*  
*predicator facundus*, qui agnoscentes, ut *viri ingenui*  
*& modesti*, quod sit, *difficilius invenire*, quàm *inven-*  
*tis addere*, *& de fundamentis ædificium extruere*,  
quàm *summum ei fastigium imponere*. In illis igi-  
tur tenebris operi manū non tantū illi admovebant;  
Sed fuerunt *& alii viri erga Religionem benè affecti*.  
Nam si verum est, quod *Bohuslai Presbyteri liber* sub  
annum 921. *Noribergæ typis vulgatus ostendit*, jam  
illa ipsa tempestate, sub *Vtraque* ut loquuntur specie,  
*Omnibus Christi fidelibus*, secundum institutionem,  
præceptumq; ejus *inviolabile*, *Cæna Domini admini-*  
*strabatur*. Fuitque hoc verum, quod *arundinem*  
*quassatā non confringet*, et *linū fumigans nō extinguet*.

Sed quemadmodum etiam num fieri solet, ut quo  
sanctior est dies festus, eo sit inquietior *Diabolus*, *& in*  
*omnes occasiones turbandi* *& sanctitatem violandi*  
*intentus*; ita quoque in istis initiis videbat pullula-  
centem *Ecclesiam*, ideo eam mendax spiritus vastare,  
opprimere *& perdere tentavit*, modo per *Episcopos*,  
qui eo tempore *cristas tollere*, seque *regibus opponere*,  
*& Sago quàm Toga*, *chlamyde quàm casula vitam vi-*  
*vere voluerunt*; modo per *Monachos* qui tum *Pragam*  
*veniebant*, *& recipiebantur*. Erat enim tum seculo  
illo,



illo, doctrina Religionis Christianæ, densissimis errorū  
ac superstitionum tenebris involuta: Mentēs homi-  
nū miseræ, crudeli servitutis iugo pressæ; vagaban-  
tur sine certâ consolatione, sine fide, sine spe. In tem-  
plis omnia ad turpem questum erant comparata; vena-  
lia jura; venalis fides; venalis salus; venale cælum, &  
planè nihil non erat venale, cælum ipsum, & quæ in  
cælo tandē à beatis possidentur, venalia bona universa.

Templa, sacerdotes, altaria, sacra, coronæ,

Ignis, thura, preces, Coelum venale, Deusque.

Et ut uno verbo dicam, omnes illi Episcopi, Archiepi-  
scopi in eo seculo erant, qui sibi magis placebant, quàm  
Peleus in machera; magis dilexerunt gloriam homi-  
nū quàm gloriam DEI. Jaromirus enim ille qui  
Sylvio Gebhardus dicitur, adeo temerarius fuit, ut &  
contumeliis & verberibus Joannē Episcopum Mora-  
viensem affecerit. Robertus corrasa pecunia in Bo-  
hemia, clam profugit in Misniam. Hermannus  
electioni Ottonis Ducis Moraviae contradixit.

Mcainhardus in Sobieslaum interregem conspiravit.  
Fridericus bona Ecclesiastica expilavit. Et ne o-

mnes commemorē, cum apud eos, auro loquente, nulla  
pollebat oratio; fuit vò nēdos idd; fuit malum lucrum  
conjunctum non malum; fuit usitatum id juvenalis,

quod frequens, sed pestilens Vespasiano in ore & re  
turpi fuit. Lucri bonus est odor ex re

Qualibet:

fuit Religio, legio; conciones, Urbium expugnationes;  
Biblia, nablia: Ecce an non in hisce antiquus serpens,  
antiquum obtinet? An non antiquum suum fallendi  
artificium exercet? dum quæ non agenda sunt, obtru-  
dit, & quæ agenda sunt, aut vilifacit, aut negligit.  
Hi sunt ii funes, hi laquei, quibus per hæreticos irreti-  
vit omnes, quotquot ab initio sunt seducti.

Tam ergo afflicto, tamque perduto Statu, cum res  
esset divina. DEVS qui solus habet immortalita-  
tem, lucem habitans inaccessam, misertus ejus calami-  
tatis, opem tulit Ecclesie, & excitato divino viro &  
Spiritus Sancti donis largissimè instructo, Carolo IV.  
Imperatore Inviçtissimo, Rege Bohemie Serenissimo;  
Patriæ hujus amantissimo, Academiae nostræ Fundatore  
munificentissimo, qui Academiam hanc, Musarum  
domicilium; pietatis asylon; sapientiæ oraculum;  
Prudentiæ habitaculum, erexit, fundavit, & à Cle-  
mente Pontifice ante annos 267. confirmari curavit,  
ut in ea Artes & Scientiæ in qualibet Facultate doce-  
rentur. Quo fundamento dato & posito, vixerunt  
& claruerunt in ea viri undiquaque doctissimi; Vi-  
xerunt



xerunt & claruerunt multi, qui cum bonis artibus  
 Religionem ipsam amarunt & promoverunt. Et ne  
 multos commemorem, claruit eo tempore Conradus  
 Austrius, concionator celebris, & acerrimus vitiorum  
 insectator; claruit M. Mathias de Janov, aliàs Pa-  
 risiensis, fervens veritatis Christi Zelator; claruit  
 M. Joannes Milicz & c. baro & concionator in templo  
 arcis Pragensis facundissimus, qui veram Evangelii  
 doctrinam, discussis tenebris, in hanc clarissimam lu-  
 cem nobis collocarunt, qua DEI beneficio hodierno die  
 fruimur. Inter quos tamen veluti Sol & Luna  
 inter sidera eminent, M. Ioannes Husius & M.  
 Hieronymus Pragenus præcelluerunt. Postquam  
 enim potentissimi quique Cæsares operam luserunt  
 omnem, quando carnalibus armis Antichristum op-  
 pugnabant, & é sôlio deicere moliebantur; spiritualibus  
 armis opus erat, quibus olim Apostoli mundum expu-  
 gnarunt, nempe verbo DEI, tanquam gladio divini  
 Spiritus invicto, & in omnem æternitatem insupera-  
 bili. Nam DEI Spiritu conficiendus erat Anti-  
 christus sine manu, quod Daniel & Paulus luculentis  
 suis vaticiniis prædixerunt. Husius itaque ex  
 suo Musæolo, cum precibus ad DEVM, tum salutari-  
 bus suis hoc ipso in loco Disputationibus, & in Sacello.

Bethlemitico concionibus adversus illam nequitie sedem, ac pestilentie cathedram, stupendum in modum quasi tonabat, fulgurabat, fulminabat, & unam post aliam victoriam (successum largiente D E O, & Virtutem dante tonitruo suo) reportabat gloriosissime.

¶ Audi visses hic varia certamina contra indulgentias Pontificis Romani promulgatas: audi visses reprehendi superbiam, luxum, avaritiam Sacerdotum: audi visses rejici vota, impurum celibatum, superstitiones, commenta Monachorum, & tyrannidem Pontificum; audi visses mutilationem Cene Dominice inculcari; cultum, invocationem sanctorum, adorationem imaginum ac statuarum reprehendi; audi visses consecrationes magicas olei, salis, aque & similium rejici; audi visses enumerationem omnium delictorum in Confessione privata, legibus Pontificum severissimis sancitam refutari, satisfactiones Canonicas pro defunctis, extremam unctionem, theatricæ missæ abusus taxari. Hæc & multa alia, cum sanctissimus Martyr de vera agnitione Filii DEI, & remissione peccatorum docuisset, regnum Pontificium prostravit, & personantes in templis boatus, contra veram doctrinam Evangelii consopivit, donec tandem in Synodo Constantiensi, contra fidem publicam, contra promissum Imperatoris,  
contra



contra jus & fas á tyrannide Pontificia, proclamatus  
hereticus, rogo est destinatus, & postea combustus.

O sancta heresis, exclamat quispiam de eo scribens,  
quæ verbum DEI veri sincerum re docet vera.

Talis fuit fidiſſimus ejus <sup>παράκλησις</sup> M. Hieronymus  
Pragenus, in sincerá Evangelii doctrinâ constantissi-  
mus sectator, qui idem opprobrium & supplicium  
causa fidei & veræ Confessionis in Christum pertulit.  
Atque hæ sunt illæ olivæ, & duo candelabra in conspe-  
ctu DOMINI terræ posita. Hic est ille secundus  
Mundi Elias, qui Bæalitarum idololatriam pro-  
stravit. Hic ille Angelus Apocalypticus, qui eter-  
num Evangelium per omnes gentes, tribus & linguas  
protulit. Hic ille Stilpon, cuj cognomen ab exitio  
Urbium Poliorcetes fuit, qui capta Patria, amissis li-  
beris, amissa uxore, cum ex incendio publico solus &  
tamen beatus exiret, interrogante Demetrio, nunquid  
perdidisset, Omnia, inquit, bona mea mecum sunt.  
Ecce Vir fortis ac strenuus; ipsam hostis sui victoriam  
vicit. Nihil inquit perdidit; omnia mea mecum  
sunt. Sic noster Hussius inter medios ignes bono ani-  
mo, quasi nihil de corpore perderet, inimicis suis respon-  
det; Hodie assatis anserem, post centum verò annos  
audietis canentem Cygnum, quem feratis necesse est.

Quod

*Quod si miramur animalia quaedam, quæ per medios ignes, sine noxa corporum transeunt; quanto hic mirabilior Vir, qui per ferrum & ignes indemnis evasit? Fuit q̃, verè λόγιος ἀνὴρ, ἁ summo λόγῳ Filio D E Ineffabili munere, ac bonitate nobis in hac ultima mundi senecta excitatus, atq; concessus.*

*Videtis ergo quanto facilius sit totam gentem, quam unum virum vincere. Inviçtus profectò Martyr, ut aurum in igne probatus, occubuit. Proinde sint magno in honore Magi apud Persas; Sint æterna in laude Gymnosophistæ apud Indos; Prædicet Græcia suos Sophos; Italia Philosophos; Gallia Druidas, habes & tu Bohemia quos deprædices. Tanti enim Martyres ex te prodierunt, quorum fama non Bohemiæ limitibus; non Germaniæ terminis; non Europæ sinibus clauditur; sed Univerſum Chriſtiani Orbem adhuc hodie pervagatur. Interim tamen dum ista cum Hufſo & Hieronymo Conſtantiæ ſunt, domi hîc inter Bohemos propagata doctrina veri-  
tatis, progressus fecit maximos, & inter graviſſimas oppugnationes crevit quotidie auditorum & confeſſorum numerus. Teſtantur hoc multorum hominum inter-  
neciones, perſecutiones, factæ hîc Præge, Gutteberge, & Lidomierziczii; teſtatur tot Concilia, tot Comitia.*  
*cauſa*



*causa Religionis hîc & alibi habita; testantur vel illi ipsi, qui Calixtini, qui Thaboritæ vocabantur, imò testatur hodie, & apud posteritatem testabitur, vel ipse textus aureis notis in fastigio Sacelli Corporis Christi incisus, & ex mandato Imperatoris Sigismundi in præsentia Legatorum Basiliensium, lingua Bohemica, Latina, Hungarica & Germanica in eadem ædícula promulgatus; Bohemos & Moravos sub Utraque specie communicantes esse veros Christianos, & legitimos filios Ecclesiæ DEI. Magnum profectò & terribile est nomen DEI nostri, qui redemit nos in sanguine filii sui, ex omni tribu, lingua, populo & natione; Cui sit benedictio, charitas, sapientia, gratiarum actio, honor, virtus & fortitudo in sæcula seculorum.*

*Lubens autem hîc brevitatis studio prætereo bellorum motus, & tempestates Bohemiæ sævissimas, partim à Pontifice, partim à Germanis causa hujus Religionis excitatas; Quinquies enim magnis exercitibus tentatam fuisse Bohemiam ostendunt historiæ; Et quidem unum exercitum ex Saxonibus collectum duxit Elector Saxonie; alterum ex Franconibus Marchio Brandeburgensis; Tertium ex Rhenanis, Suevis et Bavaris Otto Archiepiscopus Trevirësis, qui omnes exercitus, partim sunt cæsi, ac repulsi, partim*

*E*

*nondum*

nondum viso hoste, sponte sua, & quasi Pānicis terro-  
ribus contreriti diffugerunt; ut planē dubium non sit  
pro pio grege amplexo renascentis Evangelii lumen,  
pugnasse sanctos Angelos, quibus terrorem incusserunt,  
& sine armis hac sola consternatione animorum in  
fugam coniecto, tota Bohemia exegerunt. Atque  
tum Bohemi fuerunt omnibus ferē terrori. Nam

post Mortem fortissimi illius militis & Ducis Zizce,  
per annos multos excurrentes in vicinas terras; Mo-  
raviam, Austriam, Misniam, Voithlandiam, Bava-  
riam, maximis praeliis, & ingenti strage affecerunt.

His ita gestis, cum aliis Nationibus, ex voto res non  
succederet, alia via aggressus est oppugnadi Bohemos  
Paulus II. Ponti: Rom. & Excommunicationis brutum  
fulmen, non tantum in Regem Georgium Poddiebra-  
czium torsit; verum bullam promulgavit, quā excom-  
municavit nomine falso hereseos, Uiclefitas, Husitas,  
Rokyczanitas & alios veræ Religionis amantes Bo-  
hemos, contra quam bullam Georgius Rex Apologeti-  
cum scriptum opposuit.

Floruerunt ergo in Bohemia Ecclesiæ, & progres-  
sus inter gravissimas oppugnationes fecerunt maxi-  
mos, in diesq; major crevit auditorum & Confessorum  
numerus, uti ille dixit; á sanguine Martyrum Eccle-  
siam



siam crescere; sicuti in agris & pratis cum rigantur,  
omnia uberius proveniunt. Et non tantum cresce-  
bant Ecclesia, sed doctrinā, a successoribus quotidie ex-  
colebatur. Claruerunt enim post Mortem Husii  
Viri doctissimi & Sacerdotes Religiosissimi, M.  
Jacobellus Myzensis fidelis adjutor & Collega Husii  
& Hieronymi; M. Ioannes Rokyczana, M. Petrus  
Peyne, alias Pavonius Britannus socius Ioannis Vi-  
klefi fidelissimus, M. Martinus Lupacius ab Augezd;  
M. Ioannes Przibram; & M. Procopius de Plzna.  
Quorum operā & industriā Bohemia Antichristi sa-  
stum & errores intelligere, ac Evangelii veritatem  
quasi postliminio recipere & amplexari cepit.  
Neque autem tantum ii erant, sed multi alii viri do-  
ctissimi, quos longum recensere foret, qui secundum  
DEVM conservatores & propagatores Religionis  
verae fuerunt.

Talis fuit M. Iacobus Columbus Mysen prioris  
doctrinae amator & propagator strenuus. Talis  
M. Ioan: de Oppoczna Theologus Prag: qui propriis  
sumptibus literariae adolescentiae Scholam ad D. Petri  
erexit, ut pueritia Scholastica ibidem in Catechesi in-  
stitueretur. Sed quid eos commemoro, qui  
nostrae Religionis fuerunt, cum potius mirandum sit,

quid iis in mentem venerit, qui doctrinam hanc de usu integro Cene non tantum approbare, cum à partibus Papæ essent, sed eandem administrare ausi fuerint. Talis fuit Augustinus ille Lucianus Episcopus Sancturienſis, qui integrum Cene Domini sacramentum plebi utriusque sexus administrabat. Talis Philippus Novavilla, Vicecomes Palatinus, Sidonienſis & Mutinenſis Episcopus, qui cum Pragam venisset, eundem integrum usum Cene approbavit, & idoneis viris Ministerium Ecclesiasticum conceſſit.

Tanta equidem vis est veritatis, qua semel in lucem prolata, facile se per seipsam, contra omnem falsitatem & sophisticam defendit.

Toto itaque eo tempore, ut in Bohemia conservarentur semina doctrinæ veræ, quam hodie profitemur, DEVS excitavit Viros bonos & Religionis veræ amantissimos, qui quanto cum periculo & perpetuo quidem suo inter exilia continua, & persecutiones maximas, non sine profusione sanguinis id egerint, ut doctrinam illam non tantum retinerent, sed postea Confessionem scripto comprehensam Maximiliano ejus N. II. Regi Bohemiæ supplices in Comitibus offerrent, & traderent, qui forte nisi immatura morte abreptus fuisset, eam approbasset & confirmasset.

Per



Per hos Viros sanctos magnifica & gloriosa effecit,  
majestate sua Dominus. Sapienter & pacifice ama-  
runt hanc religionem. Omnes isti & multi alii, quo-  
rum nomina innumerabilia lubens prætereo, et atibus  
suis gloriam adepti sunt, & temporibus suis laude mul-  
ti iuga claruerunt. Omnes isti, sicut Sirach Jesu lo-  
quitur, sunt viri misericordiae, quorum pietates non de-  
fuerunt. Nomen Patriæ & posteris suis reliquerunt  
præclarum, in quo amplissima laudū memoria est pro-  
posita, ipsorumq; recte facta oblivione nunquam dele-  
buntur. Hereditas bona, semen ipsorum, & poste-  
ritas eorum manebit in perpetuum cum dignitate &  
gloriâ. Corpora eorum, in pace sepulta sunt; at nomē  
vivit in seculum seculi. Sapientiam eorum enar-  
rabunt populi, & laudes ipsorum prædicabunt homi-  
num congregationes. Sit igitur memoria ipsorum in  
benedictione. Ossaeorum locis ubi condita sunt, per-  
petuò frondescent, nomen ipsorum in æternum per-  
maneat; & honos hereditatem gloriæ sanctorum, ad  
filios & posteros multis seculis propagetur.

Quod ergo fieri non potuit, ut Confessio illa à Viris  
Generosis & doctis conscripta, ab Imperatore Maxi-  
miliano confirmaretur, tandem DEVS pro sua cle-  
mentia, ut Ordinum hujus Regni constantiam in fide,



perseverantiā in Religione, sedulitatem, curam in pietate probaret, post annos quatuor & triginta, Bohemiam nostram respexit, COR RVDOLPHI II. Imperatoris Augustissimi, Regis Hungariæ & Bohemiæ Serenissimi, Dn. Dn. olim nostri Clementissimi, movit, comovit, et promovit, Bohemisque ardentem & suppliciter instantibus, rogantibusque, ante annos ferè jam sex, liberū Religionis, juxta eam Confessionē Bohemicā, exercitium, Baronibus, Nobilibus, Civibus, atque adeo omnibus incolis Regni Bohemiæ permisit, peculiari privilegio confirmavit, Academiam & Consistorium iisdem Ordinibus Regni dedit, tradidit, & in perpetuum regendum sanxit & commisit.

Olim Cajo Julio Casari, Dictatori & Imperatori victoriosissimo Tullius acclamavit in ea, quam pro Marco Marcello habuit Orationem; Domuisti gentes immanitate barbaras, multitudinem innumera- biles, locis infinitas, omni copiarum genere abundantes. Fruatur sane hac laude Julius. Quid verò cunctæ illius res gestæ? quid toties collata signa? quid commissa prælia? quid obtentæ victoriæ? quid acti triumphi? quid omnis illius gloriæ militaris, quæ terrarum orbem complevit trophæa? quid Imperatoriæ majestatis monumenta bellica virtute parta? si conse-  
rantur



*rantur ad hoc ingens opus, quod Rudolphus singulari  
numinis divini afflatu suscepit, expedito successu conti-  
nuavit & confirmavit, optatōque sine perfecit.*

*Non sufficit hic flumen Tullii, non gravitas Xe-  
nophontis; non suavitas Theophrasti; non lepor Plauti;  
non latinitatis in quem omnium omni tempore disertis-  
simorum Oratorum abeant fluvii Oceanus, decan-  
tandis, aut saltem beneficiis & virtutibus DIVI  
RUDOLPHI recensendis.*

*Interim tamen, quod faceret Tullius calamo; Ma-  
ro stylo, Demosthenes ore, Cræsus opibus, hoc nos faci-  
mus, faciemus pectore & animo, tuasque Virtutes &  
facta, Virtutum & factorum laudes, & encomia, o-  
mni tempore, omnique loco pensabimus, decantabimus  
& commemorabimus,*

*Sed tu summe DEUS. cui afflicta Ecclesia curæ est,*

*Exaudi gemitus pectoris, atque preces  
naviculæque tuam, & omnes in ea Christianos  
tuos, in æstuoso mari, in medio undarum ac fluctuum  
cursu ne submergatur, conservato, sine, ut Ecclesia tua  
in eo fundamento, & angulari lapide firma, & in-  
concussa permaneat, in quo a te est aedificata; Et quia  
hoc quam verissimum est,*

*Sanguine fundata est Ecclesia, sanguine caput,*

*Sanguine succrevit, sanguine finis erit;*



Ideó eam respice de cælo & vide; visitaq; vineam tu-  
am & perfice eam, quam plantavit dextera tua, &  
quam elegisti tibi, ut palmites ejus extendantur, &  
propagines crescant; obsepi eam scuto tuo; suscipe oves  
tuas in protectionē tuam, ne ab aliquo ex manibus tu-  
is eripiantur; increpa feram arundinis; dissipa congre-  
gationem taurorum, conculcantem propter beneplaci-  
tum argenti, dissipa omnes, qui bella volunt, & nos  
potentia tua fulci & protege, imò totum hoc bonum con-  
firma, quod in nobis es operatus, ut tibi, eterno, & im-  
mortali Principi seculorū; invisibili, soli sapienti DEO  
Regi Regum & Domino Dominantium, sit  
laus, honor, & imperium  
sempiternum.

os )( so

